

YONEKONO DOPO LETA EBETE NANITABOKOBI MIDIPIATAMO OSIYODILIYA

Igilo Tabono Tanalo

¹ La: olowiopiala:, ale Igilo Tabono tanalo me leta magumulo la:tamo dawokalimitama:, ebe Tabote dopamo wagilimi mabune dokolinami ebe Kawodawala. Nanitabola, ale me tetelo ebe Tabono tanalo aimano galamo olowiote ega:walo aimano balidinomamo a:kumiyama:, iyo, ale umite aimano kotonomamo ebe atumu ologiyama:.

² Mabu ebe Igilote me opolo awokaliya ega:walo ale aimano balida:mo ebe umiyama:, ebema: ale ebena tanalo awokalimilo Nabiwi Godokono uwomua: igilo tanaloma: la:tamo me tabo ebema: kiyawautama:. Numa:la:, kebe Igilote dopamo Godago dokolinami, ebe Igilo ebe walone atamo dapawokaliya ebe atu Igilola.

³ Ebema: mabu keleka: ale ulamete dolowiyama: ebe tanalo la:tamo da:kiyawautama:? Mabu bitana a ubila la: olowiopiate ago kapiyama: eda:oma:, ale Nabiwi Godago ega:walo ebena Gudu Ya:su Kelisago kapiyama: keba kunu keda:onama: eba kunu,

⁴ ebema: nanitabola, ale me leta nosiyodiloma:, la:la, ala, a bilibilinomono kalakalate kawonomoma: keda:ma:.

Godokono Alo Magumulo Wapata:lame Tanalo

⁵ Nanitabola, ale Godokono Gudugodone dolowiyama: ebe atu tabo ma kunu ka:kiyawautama:, Godoko ebe alola, ebegodolo idoko tanalo idite kitana:, puliyanomola.

⁶ Ebema: ale idoko magumulo eba wapata:lameloma kunu degelama:, a eba:go kapiyanomoma: eda:onama:, nanitabola, a a:da: elemasigipila mabu ale aimano ilukuli magumulo a:da: gabodo tolamenama:. ⁷ Wiyasiya Godote alo magumulo keba kunu kokolinale ale eba kunu ebena alo magumulo dowapata:lamenama:, ebe tetelo ale ebe magumulo eba ilukulionalo kapiyanomoma: beda:onama:, iyo, ebena Gudu Ya:sute ebena kalimamo aimano kuba osiyodilole tanalo bilibilinomo bukulaleamenakomene.

⁸ Numa:la:, kebe tetelo a a:ka:tuwa: a kuba osiyodilolea:pima: degelama:, a a:ka:tuwa: a a:da: kelemasigiomalema:, ebena agodolo nanitabo tanalote a:kitanamene. ⁹ Wiyasiya ale aimano kuba Godotamo dawokalilaema:, ebete a walubima: kebe tabo dopamo da:kiyawaiya ebe tanalo ebete nanitabo tuputupu gabodo kosiyodilomene, iyo, ebete aimano iyaiya kuba osiyodilole tanalo egeboleamete ka:dodolomatiliaemene, ega:walo ebete aimano tepo magumuno kubakuba daleya kukulaoleamene. ¹⁰ Me mabuma: a a:ka:tuwa: a kuba osiyodilolea:pima: degelama:, ale ebe tabamo Godoko a:da: dawama: midilo ebena nani tabote a magumulo a:kitanamene.

2

Ya:su Kelisoko Ebe Aimano Walubidawala

¹ Naimano guda:la:, nale me tabo me letamo akulote la:tamo palibomo la:le kuba idi Godotamo osiyodilokapoma:, wiyasiya kebe tetelo a magumulo lumagite kuba dosiyodilomene, ebe tetelo ebe walubima: aimano Tuputupudawa ba:luta, ebe Ya:su Kelisotela, towetowe tabamo a Nabiwi Godotamo dowadipaeatenako ebe Walubidawala.

² Nanitabola, Godokono dowo tanalote atamo dopamo emaiyiya mabu a kuba osiyodilolepila, wiyasiya Kelisote aimano iyaiya kuba osiyodilole tanalo ebene kalimamo degeboleamiya, ebe tetelo ebete Godokono dowo tanalo opoliyate a Godago kapiyakobi a:miyiya. Wiyasiya numa:la:, ebe osiyodilo tanalodo ebete a nanitabokobi midipi kapiya kowalubiya:, ao, ebete ebe atu tetelo me opo epo bilibilinomo walubilima: ibino iyaiya kuba tanalo ebene kalimamo egebolelamiya.

³ Ebema: ale Godokono totomu tabamo da:tudila:oma:, me gabodo a ebene tanalo nanitabolo kiyatawaomalema:. ⁴Iyo, lumagi idite Godokono totomu tabamo tuduwata:no ma kunu degemene, “Na Godokono tanalo iyatawala,” ebe a:da: elemasigidawala, ebegodolo nanitabo tanalote kitana:, ⁵ wiyasiya kebe lumagite Godokono tabamo tuduwatate nanitabolo dosiyodilomene, ebene nilakapo kimalagidilo tanalote ebe lumagino tepo magumulo ketabokamene. Ebema: ale Godoko magumulo dilukulionama:, a keba kunu na:kiyatawaoma:? ⁶ A ebe tanalo ma kunu kiyatawaomalema:, potele Godoko magumulo okolinama: degemene,

modobola Kelisote keba kunu kepata:namile ebete eba kunu nepata:namene.

Ya:sukono Oli Totomu Tabo

⁷ Naimano wadewade namutupiala:, nale me leta magumulo Ya:sukono oli totomuno tanalo dawokalimitamo, ebe totomu dopamo wagilimi mabune la: olowiyamata, ebema: me oli totomu la:godolo tagala totomu keba kunula:ka: eba kunula. ⁸ Wiyasiya modobola ebe tagala totomute la:tamo olinoma: walo na:keda:mene, mabu me tetelo ebena nanitabo tanalote Kelisoko magumulo ega:walo la: magumulo awokalanako, iyo, idoko tanalote nolopoligo, ebene nanitabo alote eba pemaigalo na:pukuilame.

⁹ Ebema: nale me leta magumulo oli totomuno tanalo walo ma kunu kawokalimitamo, kebe lumagite alo magumulo okolinama: gelo ebena ekawitamo da:dowana, ebete idoko magumulo bokolina, iyo, ebete idoko magumune ka:nemaiga:. ¹⁰ Wiyasiya kebe lumagite ebena ekawi nilakapolo demalagidilona, ebete alo magumulo bokolina ega:walo ebena osiyodilo tanalodo ebena ekawite agowa ukamidate a:kegamene. ¹¹ Nanitabola, kebe lumagite ebena ekawitamo da:dowana, ebe idoko magumulo dokolina ebe dawala, iyo, ebete kebe gabodo kepata:nale ega:walo ebete kebamo ka:tonale, ebete ebe tanalo iyatawa: mabu idokote ebena balidi a:mula:lemi.

¹² Naimano guda:la:, na la:tamo leta nosiyodilomo mabu Godote Kelisokono elawo

mailamo la:imano kuba egebolelametate a:dodolomatililamiata.

¹³ Ega:walo naimano nabiala:, na la:tamo leta nosiyodilomo mabu la: aimano Kawodawano tanalo iyatawala, ma kunu ebe dopamo wagilimi mabune dokolinami ega:walo uwomua: tetelo dokolinamene ebe dawala.

Ega:walo oli apepeo dubala:, na la:tamo leta nosiyodilomo mabu la: Kuba Namutudawatamo eba gowelaolo ebeno wato kikopu ebo lawimata.

Iyo, naimano guda:la:, na la:tamo leta nosiyodilomo mabu la: Nabiwi Godokono tanalo iyatawala.

¹⁴ Ega:walo naimano nabiala:, na la:tamo leta nosiyodilomo mabu la: aimano Kawodawano tanalo iyatawala, ma kunu ebe dopamo wagilimi mabune dokolinami ega:walo uwomua: tetelo dokolinamene ebe dawala.

Ega:walo oli apepeo dubala:, na la:tamo leta nosiyodilomo mabu la: elawoelawonomolata, ebene Godokono tabote la: magumulo eba itanalo la: Kuba Namutudawano wato kikopu ebo lawimata.

Me Opono Inamabu Ega:walo Iyaiya Amama Tanalo Kawonomamo Akomalagidilolenala:

¹⁵ Ebema: la: nanisiwale! Me opono inamabu ega:walo ebeno iyaiya amama tanalo kawonomamo akomalagidilolenala:, mabu kebe lumagite me opono iyaiya tanalo kawonomamo demalagidilolena, ebete Nabiwi Godoko nilakapolo malagidilonama: modoboa:

¹⁶ Ebema: me opono iyaiya tanalo keba

kunula:ka? Ebe iyaiya tanalo ebe kuba epate kateneno ubilo demalagidilolenaka ebe tanalola, ega:walo iba:te balida:mo ulamete ibino ubilo duwatanaka ebe tanalola, ega:walo iba:te kebe tanalo osiyodilolelo damamaonaka ebe tanalola. Numa:la:, ebe iyaiya kuba tanalo bilibilinomate me opo epono wokine pemaimionaka, Nabiwi Godogodonea! ¹⁷ Ebema: me tanalo ebe nanitabola, me opo ega:walo me opono kuba ubi tanalate nolopoligona, wiyasiya kebe lumagite Godokono ubi tanalamo da:tuduwatamene, ebete uwomua: igilago bokolinamene.

Kelisotamo Gowela Tanalo Osiyodilodawano Tanalo

¹⁸ Naimano guda:la:, me opono uwomu tete netatali. Iyo, dopamo la: ma kunu olowiyamata, Kelisotamo Gowela Tanalo Osiyodilodawate na:pe, ebema: nanitabola, dubu epetapi bilibilinomate iyalo emaimiya Kelisotamo gowela tanalo kosiyodilolenakoma:, iba:te me tetelo me opolo bilukuliona. Ebema: a me tanalone niyatawaonama:, me tete ebe me opono uwomu tetela. ¹⁹ Numa:la:, ebe dubate aimano taneba datepiya, ebe mabuma: iba:te aimano taneba epoma: nanitabolo keda:ona:. Kebe tetelo iba:te aimano tanebapima: neda:onataleka: iba:te a magumulo bilukulionana:, wiyasiya iba:te a nanitabolo da:miyapaiya ebe tanalote a niyatuamena, ibi magumulo lumagi idite aimano tanebadawama: keda:na:.

²⁰ Wiyasiya la:imano tanalo iyanomola. Kelisote ebena Wade-talena Uliyana la: unamo dadipaniya, ebema: ka:lo la: bilibilinomate

Godokono nanitabo tanalo iyatawala. ²¹ Iyo, la: daedale kimalagidilago kilukuliawena:, wiyasiya la: Godokono nanitabo tanalo iyatawanomolata, ma kunu a:da: tabo idite ebegodone ka:pemaiganakoa:. Nanitabola, ebe mabuma: nale me leta la:tamo osiyodilomo. ²² Ebema: la: magumulo a:da: elemasigidawa potelela:ka:? Ebe Kelisotamo gowela tanalo dosiyodilona ebe lumagila, ega:walo ebe potele degena Ya:suko Kelisotea: ebe dawala. Numa:la:, ebako lumagite Nabiwi Godoko ega:walo ebenu Gudu Ya:suko ubia:noma: eba eda:nalo ebe tanalo awokala ebo genako. ²³ Iyo, kebe lumagite Godokono Guduno tanaloma: ubia: tabo awokala degena, ebete atumu Nabiwi Godotamo ubia: tabo kegena, wiyasiya kebe lumagite Godokono Gudu anikuima: awokala degena, ebete atumu Nabiwi Godoko anikuima: kegena.

²⁴ Ebema: la:le dopamo wagilimi mabune kebe nani tabo kolowiawiyama, modobola la: magumulo ebe tabote nitanamene. Nanitabola, la: ebe tabo kodakodalo datila:wenama, ebema: la: Nabiwi Godoko ega:walo ebenu Gudu Ya:suko ibi magumulo bilukulionamata. ²⁵ Iyo, numa:la:, Godago ilukuli tanalo ebe uwomua: igilola, Ya:sute atamo ikaeaema: nanitabolo degiya me ebe tanalola.

²⁶ Ebema: piyate la: a:da: masigilima: dowagelena, nale ibino a:da: tanalo awokalima: me leta ebema: osiyodilomo. ²⁷ Nanitabola, la: ibino a:da: elemasigi tanaloma a:ka:guda:ema, mabu Kelisote ebenu Uliyana la: unamo iyalo adipaniya, iyo, ebete uwomua: tetelo la:go eba

okolinalo ebe a:ka:tuwa: tanalo bilibilinomo la: biyatulamenakoma:ta, lumagi iditea:. Numa:la:, ebena iyatulame tanalo ebe nanitabonomola, iyo, a:da: tanalo idite ebegodone ka:pemaiganakoa:, ebema: ebete la: keba kunu kiyatulametana, modobola la: eba kunu ebe magumulo nilukulionala:.

²⁸ Iyo, naimano guda:la:, modobola la: Kelisoko magumulo nilukulionala:, ebema: ebena pe egelate da:pemaigamene, ale ebe teta:mo nemaimiote tolea:noma: eba eda:olo ebena ololo apulo tanalo idima: ilipokobi a:kolowioma:.

²⁹ La: iyatawalata Kelisoko ebe tuputupudawala, ebema: modobola la: me tanalo idi atumu na:kiyatawala:, keba lumagite ebena tuputupu tanalo magumulo dokolina, ebe Kelisoko keba kunula:ka: eba kunula ega:walo ebe Godokono gudu idila.

3

Godokono Gudino Tanalo

¹ Ebema: Nabiwite a nilakapolo keba kunu kemalagidiloenale, modobola la: ebe tanalo numa:la:, iyo, ebena nilakapo atamo beda: kawonomola:ka:!. Nanitabola, ebete ebena nilakapo magumudo a ebena gudima: ka:mina, iyo, a nanitabokobi midipi ebena gudima: eda:onama:, ebema: me opo epate aimano tanalo kiyatawaona: mabu iba:te atumu Godokono tanalo iyatawa:.

² Ebema: naimano wadewade namutupiala:, a iyatawala ka:lo a Godokono gudila, wiyasiya a nanitabolo iyatawa: walone a keba kunu na:kilukulionama:.. Me tetelo a me kapiya tanalo iyatawala, Kelisote atamo walo

da:ka:pemene, ebe tetelo ebe keba kunula:ka: a eba kunu keda:omalema: mabu ale ebene ololo nanitabolo kuimalema:. ³ Ebe mabuma: kebe lumagite olowiolo Kelisoko demakopelena, ebe lumagite ebene tepo magumuno daleyala ukulate walo daleyakobi a:ka:midimene, ebene ebete Kelisoko keba kunula:ka: eba kunu bokolinamene, ebene tepo magumulo daleyala tanalo idite a:kitanamene.

⁴ Ega:walo me tanalo idila. Lumagite Godokono pukala bilibilinomo magumulo kapiya idi dadikanalemene ebe tetelo ebete ebetamo kuba nanitabolo kosiyodilomene, mabu nanitabola, ebetamo kuba osiyodilo tanalo ega:walo ebene pukala adikanale tanalo ibi kapiyanomola. ⁵ Iyo, la: iyatawalata Kelisote me opamo apawokaliya ebete epono iyaiya kuba osiyodilole tanalo iyabaiamo kapalomolaema:. Ebe kapiyate me tanalo osiyodiloma: modobola mabu ebe kapiyagodolo kuba osiyodilo tanalo puliyala. ⁶ Ebema: kebe lumagite Kelisoko magumulo dokolina, ebete kuba osiyodilo magumulo a:kokolinamene, wiyasiya kebe lumagite kuba osiyodilole magumulo dokolina, ebe lumagite Kelisokono tanalo nanitabolo kelawea: ega:walo ebete ebene tanalo iyatawa:.

⁷ Naimano guda:la:, la: nanisiwale, lumagi idite la: a:da: akomasigila:la:! Numa:la:, kebe lumagite tuputupu tanalo dosiyodilolenakomene ebe lumagi ebe tuputupudawala, Kelisoko keba kunula:ka: eba kunula. ⁸ Wiyasiya kebe lumagite kuba tanalo dosiyodilolenakomene ebe Saitanakono guduma: eda:na, mabu me

opono wagilimi mabune pete me teta:mo pemaiga Saitanate iyaiya kuba tanalo kapiya osiyodilolenako. Me mabuma: Godokono Gudute me opamo ebema: pawokaliya, Saitanate dosiyodilolenako ebe kubakuba tanalo ebete nanitabolo palukolemete ka:popoliyadigalema:.

⁹ Numa:la:, Godokono gudima: deda:ona iba:te kuba osiyodilole magumulo walo a:kilukulionama:na:, mabu Godote ibi magumamo ebena igilo iyalo iyatiya, lumagite wadewade kikopu damelamo keba kunu kamionakole eba kunu. Nanitabola, Godokono igilote ebena guda:godolo ditanamene, iba:te kuba tanalo osiyodilolema: modoboa:. ¹⁰ Ebema: modobola la: niyatawala:, epono osiyodilole tanalate ibi anagiyamidalena, ma kunu Godokono gudi ega:walo Saitanakono gudi iba:te iyaiya ka:pola:nama:. Iyo, me tanalo nanitabola, piyate tuputupu tanalo osiyodilolea:no ega:walo piyate ibino ekaki nilakapolo malagidilolea:no, iba:te Godokono gudima: keda:ona:.

Idite Idi Nilakapolo Malagidilo Tanalo

¹¹ Ebema: numa:la:, la: dopamo wagilimi mabune kebe tabo kolowiawiyama ebe tabo ebe ma kunula, modobola a nanitabokobi midipi magumulo idite idi nilakapo kemalagidilo, idite idi nilakapolo kemalagidilo, a eba kunu bilukulionama:.¹² La: iyatawalata Ka:inikono tanalo, ebema: ebe keba kunula:ka: la: eba kunu eda:oma: modoboa:. Eiye, ebe Saitanakono guduma: eba eda:lo ebena ekawitamo kuba kawonomo osiyodiliya. Mabu keleka: ebete

ebeno ekawi gito danakapumiya? Iyo, ebete kuba osiyodilole magumulo eba okolinalo, wiyasiya ebena ekawite tuputupu tanalo osiyodilolenami, ebete ebetamo dowakobi ebema: olowiya.

¹³ Ebema: naimano nanitabokobi midipi ekakiala; la: tuputupu osiyodilole magumulo eba ilukulionalo, me opo epate la:tamo dowo tanalo dosiyodilolema:na; la: ebe tanaloma: akola:wa:oala: ¹⁴ A iyatawala a a:e magumune igilamo iyalo opila:iyama: mabu a nanitabokobi midipi ekaki epetapi nilakapolo nemalagidilolenama; wiyasiya kebe lumagite nilakapo kimalagidilo magumulo okolina:no, ebe lumagite a:e magumune nanitabolo ka:nemaiga:

¹⁵ Ega:walo kebe lumagite ebena ekawitamo da:dowana, ebe lumagino tanalo ebe potele ebena ekawi danakapumiya ebe dawano osiyodilo tanalo keba kunula:ka: eba kunula, iyo, ibi netewapino woki ebe kapiyala. Ebema: a iyatawala ebako lumagino tepo magumulo uwomua: igilo puliyanomola, mabu lumagi anakapumidawagodolo Godokono nanitabo igilote a:kitanamene.

¹⁶ Numa:la; Kelisote ebena igilo a mabuma: iyabaiamo iyatiya, ebema: a ebena osiyodilo tanalodo nilakapo kimalagidilo tanalo nanitabolo kiyatawaomalema; iyo, modobola a atumu aimano igilo nanitabokobi midipi mabuma: iyabaiamo balomonakoma: ¹⁷ Wiyasiya kebe tetelo a nanitabokobi midipi magumulo inamabu dogodogodawa idite inamabua:dawa umite ebe walubia:no, ebete mako tabo keba kunu na:kegemene, “Na Godoko nilakapolo

nemalagidilonamo?” Eiye, ebete ebako tabo gema: modoboa:!¹⁸ Ebema: naimano guda:la:, a epetapiatamo nilakapo tabo gito a:kegelanakoma:. Ao, modobola a epetapino modoboa: tanalo ulamelelamete iba:tamo nilakapo inamabu eba ikalamelo Godokono nanitabo nilakapo iba:tamo eba kunu kawokalimalema:.

Godokono Ololo Apulo Tolea:no Utitata Tanalo

¹⁹ Ebema: kalakala kawonomola, a me nilakapo gabodo kiyatawaomalema: a Godokono nanitabo tanalo magumulo ilukulionama:, ega:walo aimano tepo magumulo ebenu milo kapiyate eba itanalo ale tolea:noma: eda:onama: ebenu ololo apulo utitatama:.²⁰ Wiyasiya kebe tetelo aimano tepo magumuno wokite a kubakubapima: deka:imene, ale ebe kuba woki laema: modoboa: mabu ebako wokite Godogodone ka:pena:. Numa:la:, ebete aimano waminaole tanalo bilibilinomo eba iyatawanalo ebete dopamo a tuputupupima: eka:miya, ebema: ale woki bilibilima: a:keda:oma: mabu ebenu tabono elawote aimano tepo magumuno elawo nodolina.

²¹ Ebema: naimano wadewade namutupiala:, tete idilo aimano tepo magumuno wokite a kubakubapima: deka:imene, ebe kuba woki lawea:no ale tolea:noma: eda:ote aimano towetowe tabago Godokono ololo apuamo gito ka:nemaimiomalema:.²² Ebe tetelo ale beda: tanaloma: ebe da:toweoema: ebete atamo nanitabolo kikaeaemene, mabu ale ebenu totomu tabamo tudila:ote ebenu iyaiya ubi tanalo kapiya ebo osiyodilolenakoma:.

²³ Nanitabola, me Godokono kawo totomu tabola, ale ebeno Gudu Ya:su Kelisokono mailo nanitabokobi eba midinalo, a magumulo idite idi nilakapolo bemalagidilonama, Ya:sute a dopamo keba kunu kiyatuamiyale eba kunu. ²⁴ Ega:walo tanalo idi ma kunula. Kebe lumagite Godokono totomu tabamo da:tuduwatanako, ebete Godoko magumulo bokolina ega:walo Godote atumu ebe magumulo ba:kokolina. Ebema: Godote a magumulo dokolina a ebe nanitabo tanalo iyatawala, mabu ebete atamo dikaeamiya ebe Wade-talena Uliyanate a ebe tanalo niyatuaмена.

4

Godokono Uliyana Ega:walo Kelisotamo Gowelao Uliyana Ibino Iyaiya Osiyodilole Tanalo

¹ Naimano wadewade namutupiala; epetapiate ma kunu gito degelanaka, “A Godokono Uliyanagopila,” la: ibino tabo nanitabokobi akomida:la. Modobola la: wiyasiya ibino iyaiya tabo ega:walo ilukuli tanalo wadenomamo nulamelelamenala; mabu diyala, iba:te Godokono Uliyanano elawamo dilukulione o kuba uliyanano elawamo dilukulione. Numa:la; me tetelo opo kawonomolo a:da: tabo kiyawaopiate Godokono mailo ka:milo gito wapata:lamena! ² Ebema: la: Godokono Uliyanagono wokodawa ma kunu kiyatawaomamota, kebe lumagite ma kunu da:kiyawaonako, “Ya:su Kelisote lumagino apa:mo me opamo nanitabolo apawokaliya,” ebe Godokono Uliyanagonola. ³ Wiyasiya

kebe lumagite Ya:sukono tanaloma: a:da: tabo da:kiyawaonako ebe Godokono Uliyanagono wokodawa:, ao, ebena uliyana ebe Kelisotamo Gowela Tanalo Osiyodilodawano uliyana. Nanitabola, dopamo la: ma kunu olowiyamata, ebe kuba uliyante me opamo ka:pemene, ebema: ebete epatamo iyalo pemaigate me opolo bokolina.

⁴ Naimano wadewade guda:la:, piyate Godokono mailamo a:da: tabo da:kiyawaonaka la:le ibino wato kikopu iyalo elawimata, mabu la: Godokono gudilata ega:walo la: magumulo woko dosiyodilona ebe Wade-talena Uliyanano elawote kawonomoma: eda:na, iyo, ebe elawote ibi magumulo woko dosiyodilona ebe uliyana idino elawo nodolina.

⁵ Numa:la:, ebe a:da: kiyawaopiate me opono tanaloma: gelana, mabu me opolo woko dosiyodilona ibi ebe kuba uliyaganopila, iyo, me opo epono kalakala ebema: itana ibino iyaiya tabo olowioma:.

⁶ Wiyasiya aimano tanalo iyanomola mabu a Godokono gudima: eda:onama:. Ebema: numa:la:, kebe lumagite Godokono tanalo nanitabolo diyatawana ebete aimano tabo kolowimene, wiyasiya Godokono tanalo iyatawa: lumagite aimano tabo a:kolowimene. Iyo, a me gabodo niyatawaonama: kebe tanalate Godokono nani Uliyanagodone da:pemaimiona ega:walo kebe tanalate a:da: elemasigi uliyaganodone da:pemaimiona ebe iyaiya tanalo.

Godoko Ebe Nilakapodawala

⁷ Naimano wadewade namutupiala; modobola a magumulo idite idi nilakapolo kemalagidilo, idite idi nilakapo kemalagidolo, a eba kunu bowagelenama: mabu nilakapo tanalo ebe Godogodone pena. Ebema: kebe epagodolo nilakapo kimalagidilo tanalo ditanamene ibi Godokono gudila, iyo, ibi Godokono nanitabo tanalo iyatawala, ⁸ wiyasiya kebe lumagigodolo nilakapo kimalagidilo tanalote itana:no, ebe lumagi Godokono nanitabo tanalo iyatawa: mabu Godoko ebe kawo nilakapodawanomola. ⁹ Numa:la; Godote ebene nilakapo atamo ma kunu awokalimiya, ebete ebene Gudu kapiyanomo me opamo apalibiya ale nanitabo igilo ebegodone kelaema: ¹⁰ Ebema: ebe nanitabo nilakapo tanalo ebe ma kunula. Dopamo ale Godoko nilakapolo malagidiloa: tetelo ebete a kawonomamo eba malagidiloelo ebene Gudu Kelisoko atamo ebo palibiya, iyo, ebete ebene ubi ebo iyatiya aimano iyaiya kuba osiyodilole tanalo Kelisokono kalimamo egeboleamete a ebene gudima: ka:midima:

¹¹ O naimano wadewade namutupiala; Godote ebene nilakapo tanalo atamo eba kunu awokalimiya, ebema: modobola a atumu idite idi nilakapolo ba:kemalagidilonakoma:

¹² Nanitabola, me opo wagilimi mabune lumagi idite Godoko kumiya; wiyasiya kebe tetelo a magumulo idite idi nilakapolo kemalagidilo, idite idi nilakapolo kemalagidilo, a eba kunu dilukulionama; ebe tetelo epetapiate aimano osiyodilo magumudo Godoko nanitabolo kuima:na; mabu ebete a magumulo bokolina

ega:walo ebeno nilakapo tanalote a magumulo tabokanomola.

¹³ Godote a magumulo dokolina ega:walo ale ebe magumulo dilukulionama:, ebe tanalo a keba kunu na:kiyatawaoma:? Dopo tanalo ebe ma kunula, Godote atamo dikaeamiya ebe Uliyanate a kiyatuaemene. ¹⁴⁻¹⁵ Ega:walo aimano tabo kiyawao tanalo ebe a iyatuame tanalo idila. Iyo, ale balida:mo dumiyama: ebe nanitabo tanalo epetapiatamo ma kunu ba:kiyawaonakoma:, “Godote ebeno Gudu me opamo apalibiya, ebete epono Igilo Mula:lamedawama: ka:peda:nama:.” Ebema: nanitabola, kebe lumagite awokala ma kunu da:kiyawaona, “Ya:suko ebe Godokono Gudula,” Godote ebe lumagi magumulo nanitabolo bokolina ega:walo ebete atumu Godoko magumulo ba:kokolina. ¹⁶ Ega:walo ebe wade woki laema: Godokono nilakapo tanalote atumu a iyatuamedawa idima: keda:na. Iyo, Godote kawo nilakapodawanomoma: eba eda:nalo a nilakapolo malagidiloena, ebema: a magumulo kebe lumagite ebe tanalo nanitabokobi midite nilakapo kimalagidilo magumulo dokolinamene, ebe lumagite kiyatawamene ebete Godoko magumulo bokolina ega:walo Godote ebe magumulo atumu ba:kokolina.

¹⁷ Numa:la:, me nilakapo kimalagidilo tanalodo a tuputupu epoma: eda:onama:, ebema: Godote epo bilibilinomono iyaiya kuba tanalo danagilamelelaemene, ebe Kawo Egelalo ebeno ololo apuamo kalakalago ka:nutitatamalema:. Ebe tetelo tole tanalote agodolo a:kitanamene,

mabu ebete Unu Duliynomololo keba kunu kokolinale, eba kunu ale me opolo atumu kilukulionama:.¹⁸ Nanitabola, Godokono nanitabo nilakapo kimalagidilo magumulo tole tanalo puliyala, mabu nilakapo kimalagidilo tanalote tole tanalo iyabaiamo ebena elawamo ka:na:ma:tamene. Ebema: kebe lumagite Godokono ololo apuamo utima: da:toletolena, Godokono nilakapo kimalagidilo tanalote ebe magumulo woko wadenomamo kosiyodilona:, iyo, ebako lumagite nemalagidilona Godote ebetamo kuba wiya kikaemene, ebema: ebegodolo tole tanalo kapiyate itana.

¹⁹ Numa:la:, Godote a dopamo nilakapolo nemalagidiloenami, ebema: modobola a nilakapo kimalagidilo magumulo bilukulionama:.
²⁰ Ebema: kebe lumagite ebena ekawitamo dowalo ma kunu degemene, “Nale Godoko nilakapolo nemalagidilonamo wiyasiya a:ma: kemalagidilawena:,” ebe lumagi a:da: elemasigidawala. Eiye! Ebete me opolo eba okolinale kebe lumagi ebena balida:mo dumina ebe ekawi nilakapolo malagidilona:no, ebete umia:noma: deda:na ebe Godo nilakapolo keba kunu na:kemalagidilonamene? Gabo puliyanomola, a:kitanamene!
²¹ Nanitabola, Kelisote atamo kebe kawo totomu tabo dikaeamiya ebe tabo ebe ma kunula, kebe lumagite Godoko nilakapolo demalagidilona, modobola ebete atu gabodo ebena ekawi nilakapolo na:kemalagidilonamene.

5

Nanitabokobi Midipino Elawote Me Opono Elawo Anakapumi Tanalo

¹ Numa:la;, Ya:sute Godokono Alibodawa Keli-soma: deda:na, piyate ebe tanalo nanitabokobi da:midina ibi Godokono gudila, ebema: piyate Nabiwi Godoko nilakapolo demalagidilona, iba:te atumu ebenu gudi bilibilinomo atu nilakapo tanalago kemalagidilolena. ² Ebema: Godokono nilakapo kimalagidilo tanalote agodolo ebenu gudi epetapiatamo ditana, ale ebe tanalo ma kunu iyatawaonama;, kebe tetelo ale ebe nilakapolo eba malagidilolo ebenu totomu tabamo da:tudila:onakoma;, ebe tetelo ebenu nilakapo tanalote a magumulo nanitabolo itananako. ³ Nanitabola, Godoko nilakapolo malagidilo tanalo ega:walo ebenu totomu tabamo tuduwata tanalo, ebe tanalo netewate iyaiya ka:pola:na;, ibino woko osiyodilo tanalo ebe kapiyala. Ega:walo ale ma kunu a:kemalagidiloma;, Godokono totomu tabamo tudila:o tanalote atamo kodakodanomoma: eda:na. ⁴⁻⁵ Ao, eba kunua;, mabu Godokono gudi bilibilinomagodolo ebenu elawo bitana iba:te me opono kuba osiyodilo elawo kanakapuima:. Ebema: me opono kuba osiyodilole tanalo anakapuima: lumagite elawonomoma: keba kunu na:keda:namene, ega:walo potele na:ka:modobomene me opono elawo anakapuima:?. Nanitabola, a magumulo potele ebenu nanitabokobi midi magumulo Ya:suko Godokono Guduma: degena, ebe dawate modobo elawo belawenakomene.

Ya:su Kelisokono Nanitabo Tanalo Dawokalim-ina Ebe Netewa-kapiya Tanalo

⁶ Me tanalo nanitabola, Ya:su Kelisote me opamo da:piya, ebete ebena nanitabo tanalo awokalima: ebete obo ega:walo kalima ka:ka:liya tanalago atamo a:pemaigiya, iyo, ebete me netewa gabodo ebena tanalo atamo apawokalimiya. Ega:walo me tanalo idila, Godokono Uliyanate atumu Ya:sukono nanitabo tanalo kawokalimina mabu ebe Godokono nanitabo tanalo awokalimidawala. ⁷ Ebema: Kelisokono tanalo kawokaliminama: me netewa-kapiya tanalate ba:pola:nama:na; ⁸ Godokono Uliyanano tabono tanalo, ega:walo Kelisokono kalimate deka:ka:liya ebe tanalo, ega:walo opo lumagite ebe obamo daduba:midiya ebe tanalo, iyo, me netewa-kapiya tanalate me atu tanalo awokalimina, Ya:su Kelisoko ebe Godokono Gudula.

⁹ Numa:la; me opo epate nanitabolo degelanaka, tete bilibilinomo epetapilo ale ebe tabo nanitabokobi da:midilina: ebe tanalo kuba:. Wiyasiya Godote ebena Guduno tanaloma: kebe tabo kegenale, modobola ale ebe tabo wadenomamo olowite nanitabokobi ka:midimalema; iyo, Godokono tabono iyaiya tanalo ebe nanitabonomola, ebete a:da: tabo ka:kiyawaona; ebema: ebena tabono elawote opo epono elawo nodolina. ¹⁰ Ebema: kebe lumagite Godokono Gudu nanitabokobi da:midina, ebe lumagino tepo magumulo Godokono nani tabote bitana. Wiyasiya numa:la; kebe lumagite Godokono tabo nanitabokobi midia:no ebe lumagite me gabodo Godoko

a:da: elemasigidawama: midina, mabu Godote ebena Guduno tanaloma: nanitabolo degiya, ebe nanitabokobi midia:dawate ebe tabo ubia:noma: eda:na. ¹¹ Nanitabola, Godote ebena Guduno nanitabo tanalo awokalima: me tanalo osiyodiliya, ebete ebena Gudugodolo ditana ebe uwomua: igilo atamo ikaemiya. ¹² Ebe mabuma: kebe lumagite Godokono Gudu nanitabolo danikumina ebegodolo uwomua: igilo bitana, wiyasiya kebe lumagite Godokono Gudu lawea:no, ebe niyala, nanitabo igilote ebegodolo kitana.

Godokono Guduno Uwomua: Igilono Tanalo

¹³ Ebema: la: piyate Godokono Guduno mailo nanitabokobi da:mida:wenama, na me leta la:tamo osiyodilomo, la:le uwomua: igilo delawa:wiyama ebe igilote la:godolo eba itanalo la:le nanitabolo kiyatawaema: ¹⁴ Nanitabola, ale towetowe tabago Godokono ololo apuamo da:nemaimioma:, ebe tetelo ale tolea:no aimano iyaiya modoboa: tanaloma: ebe kanamalema:, ebema: a me tanalo iyatawala, ale kebe tanalo ebena ubilo ebe da:toweoema:, ebete ebe towetowe tabo nanitabolo kolowimene. ¹⁵ Ega:walo a iyatawala, Godote aimano towetowe tabo dolowiomene ebete a nanitabolo kowalubimene, iyo, a kebe tanalo ebegodone laema: ebe da:toweoema: ebete atamo kikaemene, mabu tete bilibilinomolo ebete aimano iyaiya towetowe tabo olowionako.

¹⁶ Ebema: la:le nanitabokobi midipi magumulo ekawi idino kuba osiyodilo tanalo duma:ema, modobola la: ebena tanalo Godotamo towetowe

tabamo nadipatemiyala;, ebene Godote ebenu tepo magumuno tanalo wadekobi midite ebetamo igilo walo ka:kikaemene. Wiyasiya kebe tetelo lumagite kuba kawonomo dosiyodilomene, ma kunu ebete Godokono Uliyanano nanitabo woko kubama: degemene, ebe tetelo ebenu igilo mabuma: Godotamo akotowetoweala;, modobola ebako kubadawate a:eamo na:toamene. ¹⁷ Numa:la;, me kuba osiyodilo tanalo kapiyanomote lumagi a:eamo kemagatamene, ebema: la: naimano tabono tanaloma: woki bilibilima: akoeda:oala:. Nanitabola, a epono osiyodilole tanalo bilibilinomo magumulo aimano tuputupua: tanalo ebe Godokono pukala wakalami tanalola, wiyasiya kalakala kawonomola, ebegodolo elawo bitana ebako iyaiya kuba osiyodilole tanalo egeboleamete igilo atamo walo ka:kikaeaema:.

¹⁸⁻¹⁹ Nanitabola, a iyatawala Godokono guda:te kuba osiyodilole magumulo kilukuliona:, mabu Godogodone dawokaliya ebe Elawodawate ibi na:ga:lulatelena Kubadawa Saitanate ibi kubailamekapoma:. Ebema: numa:la;, me opo kawonomote ebe Kubadawano elawo magumulo itana, wiyasiya a iyatawala a nanitabokobi midipiate me opolo eba ilukulionalo a Godokono gudima: eda:onama:, ebema: kuba tanalo idite a a:kologimene. ²⁰ Ega:walo a tanalo idi iyatawala, Godokono Gudute me opamo da:piya, ebete atamo wade mulo tanalo a:pikaeamiya ale Nanidawano tanalo wadenomamo kiyatawaonama:. Numa:la;, ebe Nanidawa ebe Godotela, ebe Uwomua: Igilola,

ebema: kalakala kawonomola, ale ebeno Gudu
Ya:su Kelisoko magumulo bilukulionama:!

²¹ Ebema: naimano wadewade guda:la:, mod-
obola la: nani Godo kapiya eba amamatenalo,
ida:da:li epetapi amamalatele tanalamo ega:walo
ibino a:da: elemasigi uliyanano wokino tanalamo
akotudila:onakala:.

Me ebe naimano tabo uwomula. Taula.

GODOKONO WADE TABO
The New Testament in the Fly River dialect of the
Tabo language of Papua New Guinea
Nupela Testamen long tokples Tabo (Fly River) long
Niugini

Copyright © 2006, 2023 The Bible Society of Papua New Guinea and
Wycliffe Bible Translators, Inc.

Language: Tabo (Fly River) (Tabo)

Dialect: Fly River

Translation by: Wycliffe Bible Translators

This translation is made available to you under the terms of the Creative
Commons Attribution-Noncommercial-No Derivatives license 4.0.

You may share and redistribute this Bible translation or extracts from it
in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are
licensed just for use with those Scriptures and documents. For other uses,
please contact the respective copyright owners.

2024-03-04

PDF generated using Haiola and XeLaTeX on 5 Mar 2024 from source files
dated 4 Mar 2024

cbbd3ff2-0ca7-5896-b3fd-850bc0fd18b7